


luni 10, 2017

Ripoti a le Peresitene

Faauuga 31st



Moreli J. Niuatoa
KOLISI FAAFAIFEAU I KANANA FOU

O TALA MAI LAU KOLISI FAAFAIFEAU

FAATAUMUAAVA

O paia o le aso ma le aofia ua mamalu tau ee i le maota nei ia nuunuu atu. Lele ua matala le matagalau o le tai o Atoa, ua sua fuefue le tai o le Tagaloa. Ua taunuu mai le vaa na tiu tau mai i le vaa na tau, ao maumau pea lago o le vaa na faō a folau. Ua tala pausi ai nei le mafua na i lotoa, a e a'e mālō ulu 'afa pei o le fetalaiga i le faiva i tuā'au. Ua iite ai nei le malama na i Saua, ua liligo le tuā'au mafua malu, auā ua logo i mauga o Ao le taeao na soifua. Tulou, tulou, tulouna lava.

E faatalofa atu i le maua luga o le Ekalesia Aoa, Komiti a Tamā o le Ekalesia, le Komiti Faafoe, faapea le mamalu o le aufaigaluega, faifeau ma faletua. E faatalofa atu foi i le paia o le atunuu i tupu ma ee faapea le 'auvalaaulia. Mamalu mai o tofiga a le mālō, ta'ita'i ma le faigamālō, talofa, talofa lava.

Lea ua faataumuaava le sa o le Vasega Faai'uso o lenei tausaga 2017. Ua mae'a ona tofosi faalauti ma mamanu faala'ei o tupu le aufaigaluega o A'oa'o ma Faletua i le fa tausaga o lo latou soifua a'oa'oina auā le galuega a le Ekalesia. O le tatolo ia alofa le Atua e faatoatoa le saunia o alo ma fanau a le Ekalesia mo le galuega. O le mafuaaga lena ua tupu ai lenei taeao matagofie. O le taeao 'ula ma le taeao toto'a ua mālō pule ua mālō le tilitili alualu ia te outou le fanau faauu.

E fai a'u ma sui o le laumua i Kanana Fou e faaoo atu le faamālō ma le faafetai tele ia te outou matua, aiga, o nuu ma aulotu ma latou uma na tofiu sa o le saunia o lenei aufaigaluega. Ia faamanuia le Atua. Faafetai.

“O se Tapenaga Mautu mo a Taeao o Le Faia Lea o Mea Sili i le Taimi Nei.”

A. BACHELOR OF DIVINITY (BD)

Ua atoa i le tausaga lenei le sefulu-fitu (17) tausaga talu ona tauaoina le faailoga o le Bachelor of Divinity (BD). O luma atu na amata i le faailoga o le Diploma of Theology mo le fa (4) tausaga, faato'ā sosoo lea ma le BD mo le isi tolu (3) tausaga. Pe a tuufaatasi tausaga e maua ai le faailoga o le BD ona maua lea o le fitu (7) tausaga. O se taimi umi ma na ave ma ala e toe a'oa'oina ai isi vasega ua mae'a ona ave i tausaga e fa o le Diploma, e ui ina sui igoa o mataupu/vasega, e 'auga lava e tasi.

Na afua iina le faamoemoe ma le suiga o iai nei e amata sa'o le a'oa'o i le faailoga o le BD pe a pasia le Suega Ulufale (*Entrance Exam*), ma le Ta'utinoga i luma o Tamā o le Ekalesia, le Komiti a le Au Toeaina. E tusa o le lima (5) lenei o tausaga talu ona amata le a'oa'o ulufale i le faailoga o le BD.

Na amata faatasi suiga ia ma le toe iloilo o faiga ma le faatulagaga o mataupu ma nisi o vaega e mana'omia ina ia faauu le a'oa'o i le fa tausaga (curriculum). O nei suiga na mulimulita'i lava i le Ta'iala a le South Pacific Association of Theological Schools (SPATS) ma le Pacific Qualification Framework (PQF). O faalapotopotoga ia e lua o loo aloa'ia ai Kanana Fou, Malua, Piula, ma isi kolisi faafaifeau a le Pasefika. E pei ona iai nei le suiga ua lima (5) vasega e mafai ona ave i le kuata (*semester*), maua ai iunite (units) e 15 i le kuata. E tatau ona mae'a iunite e 30 i le tausaga aoga atoa mo le fa tausaga ona maua ai lea o le 120 iunite e faauu ai (faatasi ai ma nisi o vaega o le porokalama) mo le faailoga o le Bachelor of Divinity.

E. CERTIFICATE IN THEOLOGICAL STUDY (CTS)

Ua atoa foi i le tausaga lenei le lima (5) o tausaga o le porokalama ua faia lea i le afiafi pe a manava galuega o le Certificate in Theological Study. Na faavaeina lenei porokalama ona o le finagalo o Tamā o le Ekalesia ia faia se porokalama faalemafaufau mo A'oa'o Fesoasoani (AF) i o latou foi tiute fesoasoani i le galuega.

E 48 iunite o le CTS mo le lua (2) e aoga ai. E fa (4) usuga o le porokalama i le tausaga aoga; e lua (2) i le vaitau malulu (*spring*) ma le isi lua i le vaitau malili (*fall*). O le porokalama lenei o le CTS ua aloa'ia ma taualoaina e le faalapopototoga a le SPATS ma le PQF.

Faasilasilaga mo le Porokalama CTS: Mo latou uma ua iai le lagona e fia ulufale i le CTS, o le a faasalalau atu i le TV, leitiō, ma le nusipepa le aso e resitala ai mo vasega. Faamolemole, o le suiga ua iai nei e resitala ma totogi uma vasega ae le i amata. Pe afai e lē totōgia au vasega e faamalulū atu o le a lē aofia ai oe i le aso amata. O le tau o le vasega e tasi e **\$45.00**. E tatau ona resitala le tagata mo vasega e tolu ina ia mae'a lana porokalama i le lua tausaga. Faamolemole ia faautagia mai lenei faasilasilaga nei misi lou avanoa e te selesese ai nei faamanuiaga faa-mataupu silisili e ala mai i le aufaigaluega faiaoga o a'oa'oina vasega o lenei porokalama.

I. FAIAOGA MO LAU KOLISI FAAFAIFEAU

O le tiute o le Ekalesia i le soifua faatuatua o tagata lotu i le 21st seneturi e tāua auā ua na o ia na te mafai ona faatumu ma faamalie le mana'o o soo se tagata saili. Pe a faaletonu pe leaga lau taavale e ave i le fale taavale e fai ai. A gasegase foi se tasi, o le falema'i le nofoaga sili e saili iai togafitiga ma vailaau. O le Ekalesia o le nofoaga e sulufa'i iai tagata ua vaivai le ola faaleagaga; o le falema'i mo tagata agasala ae le se nofoaga ua faapitoa na o tagata lelei.

E tatau ona lelei le soifua faaleagaga, lagona faaletagata ma tino malolosi tagata lotu. O loo tatou ola i se lalolagi faaletonu. To'atele fanau e tutupu a'e i aiga o faaletonu mafutaga, to'atele e leai ni galuega ma tagata Kerisiano ua tauau lava ina magoto ifo i le loloto ae sa le i faapea muamua. To'atele tagata lotu o taumafai aiga ma o loo tauivi pea i aso uma, ua tatou lagona foi le ma'ati o le mea moni e pei lava o latou o tigāina. E le 'alo ese le tagata faatuatua mai faafitauli ia o le olaga. Ua atulasi suiga ua tosina ai tagata lotu. O le mafuaaga tonu lea ua tatau ai ona loloto le silasila a le Ekalesia, ma ia lelei le a'oa'oina o le aufaigaluega e feagai ma suiga ma faafitauli o aso nei. E tatau ona a'oa'oina le aufaigaluega a le Ekalesia i metotia ma faiga e talafeagai ma aso nei ina ia tumau pea le faatuatua o tagata lotu i le Atua. Ina ia aliali le faimea sili o le Ekalesia mo aso nei, e tatau ona ofoina atu e le Ekalesia ni ana auunaga lelei, galuega faufautua (*counseling*) ma fesoasoani mo latou o mana'omia.

E faafetaia le alofa ma le agalelei o le Atua ona ua taulau manuia le faamoemoe o nisi o le aufaigaluega faiaoga na talosia i a'oa'oga auā le atinaega o lau Kolisi Faafaifeau i ana faiaoga. Ua mae'a ai ma le manuia porokalama a le susuga i alii faiaoga foma'i ia Dr. Elekosi Lafitaga, faiaoga o le Feagaiga Fou, ma le susuga ia Dr. Ben Laie, faiaoga o le Feagaiga Tuai. E lagona le agaga fafia ona o loo auaua'i mai pea le aufaigaluega faiaoga ua maua lo latou soifua a'oa'oina mo le galuega i totonu o le Kolisi Faafaifeau a le Ekalesia.

O le susuga ia Dr. Elekosi Lafitaga ma le faletua ia Falenaoti na aoga i le Graduate Theological Union (GTU), Berkeley, Kalefonia. O le susuga ia Dr. Ben Laie ma le faletua ia Nunuiasolelei na a'otauina i le Kolisi Faafaifeau i Claremont School of Theology, Claremont, Kalefonia. Ua mae'a nei o la faailoga o le Doctor of Philosophy (PhD) i a'oa'oga ma su'esu'ega sikolasipi o i le Tusi Paia. Faafetai i le tapuaiga a aiga faapea nuu ma ekalesia ua a'e mālō ai faiva ma le tausinioga o lenei aufaigaluega auā lau Kolisi Faafaifeau i Kanana Fou.

O le susuga i le alii faiaoga ia Luaao Leasiolagi o loo faamae'a foi lona faailoga o le PhD, mataupu tau Talafaasolopito o le Ekalesia ma Talitonuga Kerisiano Eeseese (*Ecumenical Study*). Ua le o toe taugofie le nofo ai i Fiti e faamae'a lana pepa o le mafuaaga lea ua fautuaina ai le susuga i le faiaoga ina ia fo'i mai e faamae'a atu iinei lana pepa ma faauu ai i le tausaga fou 2018. O lea faamoemoe pe afai e gasolo manuia le tapenaga o le pepa ma faamalieina vaega uma o le porokalama.

O le susuga foi i le alii faiaoga ia Pasesa Sapolu o loo faaauu pea lona taumafai i le Feagaiga Tuai i vaega tau Faaliliuga (*Interpretation*) o le Tusi Paia, aemaise lava o le Feagaiga Tuai. O loo iai nei le alii faiaoga ma lona faletua ia Sharma i le Graduate Theological Union (GTU), Berkeley, Kalefonia, mo lona faailoga o le Doctor of Philosophy (PhD). Ia talosia pea le faamoemoe o lenei auuna ina ia manuia.

E pei ona ta'ua i la'u ripoti o le tausaga ua mavae (2016), ua aga'i atu Kanana Fou i se isi laasaga mo le faalauteleina o le atamai faa-mataupu silisili ma agavaa i matati'a faalemafaufau auā lona atina'ega ia mautu mo le tapenaga o fanau a le Ekalesia. O le lelei o le saunia o fanau a le Ekalesia o le ata foi lena o le manuia o le Ekalesia i

le lumana'i. O le mau a le mafaufau e lē momolia e le loto i le isi loto, e momoli e le fofoga fetalai (e upu ma tala) i le loto. O iina e afua mai ai le atamai ma le malamalama e fanauina le tōfā ma le faautautaga lelei. O le a'oa'oina atili o le tagata o le tilitili alualu foi lea o le lalolagi i ana faiga e faatoilalo ai le atamai o le tagata.

E tāua lava ma faasilisili le saunia o faiaoga a lau Kolisi Faafaifeau mo le tapenaga o fanau a le Ekalesia mo le feagai ai ma suiga o le olaga lenesi; aemaise lava o tapenaga mo le Galuega Faafaifeau.

O. POROKALAMA FAAMASANI A A'OA'O (*Field Work*) GALUEGA FAAFAIFEAU

O le filosofia faa-faleaoga e faapea, e fanauina e le mafaufau le mau ma le tomali e faatino ai le tū ma le aga a le tōfā mamao. O le tōfā mamao o le “vai loloto” lea o i le mafaufau e mafai ona gaepu i gaoioiga a le tino. I se isi faaupuga, e o faatasi le mafaufau ma gaoioiga a le tino ina ia fausia le tōfā mamao. Ua faapena le ‘auga ma le faamoemoe o le porokalama faamasani—e faafesoota'i ai le tū a le mafaufau (*theory*) ma galuega faatino (*practice*). O lenesi porokalama faamasani e aofia ai vaega tāua ia e valu (8) po o le sili atu foi:

- a. **Ou Faiva Alofilima** (*Professional Identity*)
E a'oa'oina ai faiva alofilima o le a'oa'o ma le faletua—faa-faifeau ma faa-faletua—e ala lea i agavaa lautele faa-faifeau ma faa-faletua, atamai ma isi vaega tāua o le galuega.
- e. **Ou Faiva Amio ma le Faatāua o Mea e Tutupu** (*Professional Ethics*)
E a'oa'oina ma faatino le tāua ma le amio faa-aufaigaluega ma fausia le agavaa e faatatau ma galueaina auala e fo'ia ai faafitauli, vesiga, ma isi o vaega faaletonu faalilolilo o aofia i le galuega faa-faifeau.
- i. **Atamai** (*Knowledge*)
O le a maua e a'oa'o ma faletua avanoa talafeagai e fausia ai le fesoota'iga o le potu a'oa'oina i potu aoga ma le agavaa ua maua mai le vaavaai i le faatinoga o le galuega a o aga'i atu i le tapenaga mo le galuega faa-faifeau.
- o. **Agavaa** (*Skill*)
O le a mafai e le a'oa'o ma le faletua ona fausia agavaa e talafeagai ma faataitai i galuega faa-faifeau i nisi o tagata ma nofoaga o galulue ai.
- u. **'Auai o A'oa'o ma Faletua i Taualumaga o le A'oa'oina** (*Student Engagement in the Learning Process*)
O le 'auai pea o le a'oa'o ma le faletua i taualumaga gasolo o le ola a'oa'oina ma fausia ni ala e toe mafaufauina ai le galuega ma fa'aaoga tataua le tāua o le lagolagosua ma avatu fautuaga.
- f. **Atamai o le Tagata Lilo** (*Internal Awareness of Self*)
O le a fausia se atamai e tali atu i mea na a'oa'oina ai, e aofia ai le tupu pea o le iloa faalemafaufau o isi tagata, afaigaluega, ma faiga eseese, e fesoota'i ma le faatinoga o nei mea uma.
- g. **Fetuuna'iga o Faafitauli Lautele** (*Social Problem Analysis*)
O le a fausia le agavaa e faailoa ai, fetuuna'i, ma tali atu i nisi o faafitauli tugā ma malamalama i le aafiaga mo tagata lotu. O le a iloa ona silasila ma faatulaga vaega eseese o le olaga lautele ina ia iloilo ma fetuuna'i lelei se tali e talafeagai ma faafitauli o tutupu.
- l. **Amiotonu Lautele** (*Social Justice*)
O le a fausia se atamai faavae ma nisi o agavaa e fesoota'i e mana'omia mo le faataunuaina o le amiotonu mo tagata lautele o afaina. O iina o le a manino ai le tōfā ma le faautaga e finauina ai le mea sa'o.

Ua ou ta'ua i luga nei vaega tāua e valu (8) o le a maua e a'oa'o ma faletua pe afai e auai i le porokalama o le Faamasani i le Galuega Faafaifeau. O le avanoa e faa-talafeagai ai le filosofia o a'oa'o i le potu aoga ma le agavaa e maua i le faatinoga o le galuega.

O le tausaga lenei e amata i le masina o **Setema 29** le porokalama Faamasani i Galuega Faafaifeau a le Tausaga Faai'uso. O lenei porokalama o se tasi o vaega tãua o le faailoga o le BD e pei ona iai le faatulagaga ua faatonu mai e le South Pacific Association of Theological Schools, faatasi ai ma le Pacific Qualification Framework. O le tãua o lenei porokalama faamasani ina ia fesoasoani le aufaigaluega o galulue i aulotu i le a'oa'oina o fanau i le faiga o le galuega (*feasibility study*). O le faafesoota'iga o le mau faalemafaufau (*theoretical study*) o a'oa'oina i le potu aoga ma le faatinoga i le galuega. E tele nisi vaega o le galuega e mafai ona lagolago ai le aufaigaluega o galulue ina ia faamasani ma a'oa'o ai le aufaigaluega i a'oa'o ma faletua e le o faatinoina i totonu o potu aoga. O le mea lea e tãlo atu ai ma le agaga maulalo ina ia tatou galulue faatasi mo le faataunuaina o lenei porokalama tãua mo alo ma fanau a le Ekalesia. E mamae le tava'e i ona fulu, a o le a'oa'o ma le faletua o Kanana Fou i lana faalelegãfulu.

O le Matagaluega i Sisifo, Amerika Samoa, ua oo atu iai le faasologa o lenei porokalama. Ua mae'a ona faailoa e ala atu i le Komiti Faafoe (*Board of Regents*), ma le Komiti a le Au Toeaina. E talosaga atu i susuga i faifeau, ma le agaga maulalo, ina ia fesoasoani mai mo lenei faamoemoe auã alo ma fanau a le Ekalesia ma le tapenaga mo le Galuega Faafaifeau.

U. O LE VASEGA FAAI'UASO 2017

E to'asefulu-fitu (18) le Vasega Faai'uso o lenei tausaga, 2017. E to'aono (6) le faailoga o le Bachelor of Divinity, e sefulu-lua (12) le faailoga o le Certificate of Theological Study, a e to'atolu (3) le Certificate in Women Theological Study. O latou nei ua pasia vasega ma isi o tulaga mo le faamalieina o a latou porokalama faalemafaufau na a'oa'o ai i le fa ma le lua tausaga (pe na sili atu foi).

Bachelor of Divinity	Certificate in Theological Study	Certificate in Women Theological Study
Apisaloma Toleafoa	Lora Faalevao Toleafoa	Lora Faalevao Toleafoa
Craig Masaniai	Mose Tipi	Stella Young
Vagana Saili	Seupule Richard Ripley	Ekueta Saili
Troy Foilefutu	Manutafea Ifikoko Fano	
Faiana Ofati	Sumeo Matamu	
Timothy Young	Penani Lefaoeseu	
	Memea Sinalua Sio	
	Talosaga Kalati	
	Fualau Sanerivi Mata	
	Legatasia Lauti	
	Joshua Yandall	
	Logova Fereti Schuster	

E momoli atu le faamãlõ ma le faafetai i le Vasega Faai'uso o lenei tausaga 2017. Talitonu e tele nisi o lu'itau tugã na outou feagai ae na manumãlõ lava lo outou faapalepale ma le onosa'i auã sa outou finau ma tatalo mai outou matua ma aiga. Lea ua tau lau o lo outou faamoemoe. Viia le alofa o le Atua. Mãlõ le tau!

F. O LE ULUFALEGA FOU – 2017

O le masina o Setema ua faamoemoe e ulufale ai latou ua faamaonia a latou Suega Ulufale ma le Ta'utinoga i Tamã o le Ekalesia. E to'afitu (7) i latou ua faamanuiaina mo lenei ulufalega. O latou suafa ma matagaluega na su'e mai ai ua faamauiina i lalo:

1. Meke Mata'utia (Matagaluega Tutotonu)
2. Helen Mata'utia (Matagaluega Tutotonu)
3. Fulifuli Taveuveu
4. Euta Asifoa (Matagaluega i Sisifo)

5. Magaga Talo (Matagaluega Niu Sila ma Ausetalia)
6. Sitau Ofoia (Matagaluega i Sisifo)
7. Ronald Tuimauga (Matagaluega i Sisifo)

E naunau pea ina maua ni sui ua lagona le fia aoga mo le galuega a le Ekalesia. E le uma le musumusuga puialii a le Agaga Paia mo se ua fia ofo atu mo le galuega a le Ekalesia. Ua le o toe tutusa foi le numera o sui e su'e le Suega Ulufale i tausaga ta'itasi. E aga'i pea i lalo le fuainumera o tagata su'e. Ua tele nisi o suiga lelei ua tula'i mai i lau Kolisi Faafaifeau. O nei suiga talafeagai o galuega na punonou ai nisi o le aufaigaluega na galulue i totonu o le Kolisi. Lea ua mafai ona faatino i lenei foi vaitau o matou galulue ai. E tō lo'u pulou ma faafetaia le galuega a susuga i Alii Pule na latou asaina le amataga o nei suiga ua 'ae'ae ai fanau a le Ekalesia i lenei vaitaimi. Faafetai le faama'ite mea sili auā lau Kolisi Faafaifeau ia manuia.

O le a amata le kuata o le tau malili (*fall*) ia **Setema 5, 2017**.

L. NISI O TAUALUMAGA FAATINO A LAU KOLISI I LENEI TAUSAGA, 2017

• A'oa'oga Faapitoa mo le Aloa'ia o Aoga Faafaifeau na Faia i Piula

O le masina o Aperila 18-20, na faataunuaina ai se tasi o a'oa'oga faapitoa (*workshop*) mo faiaoga ma tagata galulue a Kolisi Faafaifeau a Samoa—Malua, Piula, ma Kanana Fou. Sa faia lea aoga i le laumua a le Kolisi Faafaifeau i Piula, Metotisi. Na 'auai uma ia susuga i alii faiaoga ma tagata faigaluega a lau Kolisi Faafaifeau ma le tala fiafia i le tāua o lenei a'oa'oga. Na tapua'i foi susuga i alii pule ma o latou faletua.

O le faamamafa o lenei a'oa'oga ia fesoasoani lea i alii faiaoga ma tagata faigaluega a kolisi ia malamalama i o latou tiute ma faiva auā tapenaga a kolisi faafaifeau mo le asiasiga a le SPATS ina ia aloa'ia pea porokalama ma mataupu o a'oa'oina (*accreditation*). Ua fesoasoani lea a'oa'oga mo Kanana Fou auā galuega tau atia'e ma le toe iloiloa o mataupu ma faiga e faataunuu ai.

• Mafutaga a Kolisi Faafaifeau a le Ekalesia Samoa—Malua, Piula, Kanana Fou

O le masina foi o Aperila 21 na faataunuaina ai le faamoemoe sa talosia o Kolisi Faafaifeau a le Ekalesia Samoa i le Laumua i Malua. Na uiga ese lea mafutaga mai le tele o mafutaga i tausaga ua mavae ona ua masii ato atu le Laumua i Kanana Fou. O mafutaga i tausaga ua mavae na malaga na o se vaega o vasega ta'itasi ma nisi o alii faiaoga, e ese mai lenei tausaga. O le fealofaniga le agaga sili na tulituliloa i lenei faatasiga matagofie.

Na umi se taimi ma le avanoa e mafuta ai vasega ta'itasi—Piula, Malua, Kanana Fou—ina ia feiloa'i ma soālaupule i mataupu eseese auā le faafaleleina o le soifua faaleagaga. O le sini na faa'auai iai talanoaga a vasega pe faapefea ona "Talatala le Nunumi." O le fesili i le "to a le Agaga Paia" na taumafai e talatala lona lavelave ma le nunumi auā na faia lea mafutaga ina ua mae'a le Eseta. Na avea lenei avanoa e talanoaina ai mau mai vasega ta'itasi tuufaatasi ma molimauina ai le tōfā tatala a susuga i alii a'oa'o ma faletua o Kolisi Faafaifeau a le Ekalesia.

Ua iai le faamoemoe o le isi mafutaga o le a maua le nofoaga e tali ai pe a mae'a ona fetuuna'i ma alii pule o a tatou Kolisi Faafaifeau i Piula ma Malua i se taimi o lata mai. Na momoli le agaga faafetai tele i lana afioga i le Alii Pule ia Maafala Lima ma le faletua ia Lalokava, susuga i alii faiaoga ma faletua, faapea a'oa'o ma faletua i Malua mo lana talimālō lelei i lenei faamoemoe tāua.

• A'oa'oga o Galuega Faufautua mo le Aufaigaluega i le Ekalesia Kelisiano Tuvalu (*Workshop: Ministry in Context Training for Pastoral Caring and Counseling Ekalesia Kelisiano Tuvalu*)

O le masina o Me 3-8, 2017 na faataunuu ai lenei a'oa'oga tāua mo susuga i alii faifeau ma o latou faletua a le Ekalesia Kelisiano i Tuvalu. O ma'ua ma le susuga i le alii faiaoga ia Rev. Simi Mauga na avea ma faiaoga o lenei a'oa'oga (*facilitators*). Na faatupeina lenei a'oa'oga i se vaega tupe mai le United World e faamautu lea i Ausetalia. O lea avanoa na auala mai i le Ekalesia Kelisiano i Tuvalu (EKT) na faatupeina lenei a'oa'oga faatasi ai ma pasese

ma fale e nonofo i ma'ua ma le alii faiaoga ia Mauga. Na faia lea a'oa'oga i le motu o Funafuti, po o le taulaga lea i Tuvalu.

O le a'oa'oina o le aufaigaluega i metotia ma faiga e fesooota'i ma fesoasoani i tagata lotu ia latou faafitauli tau le mafafau o se galuega tāua tele. O le to'atele o susuga i faifeau a le EKT e le i maua ni a'oa'oga i mataupu e faatatau i galuega faufautua (*counseling*). O le mafuaaga lea na a'e ai se manatu i le ekalesia e saili se auala e avatu ai lenei a'oa'oga mo le aufaigaluega o galulue nei, ma latou o galulue i galue a le EKT.

Tasi o mataupu aoga na tula'i mai i lea a'oa'oga na faia i le aufaigaluega o le talosaga pe mafai ona faagaoioi le porokalama a le Certificate in Theological Study (CTS) lea e faia ia tatou i le afiafi. O loo iai nisi o le aufaigaluega a le EKT na faauu atu i Kanana Fou ua faamanuiaina i faailoga o le Master i le mataupu silisili. Pe afai e taunuu lea faamoemoe o le a malaga atu faiaoga a Kanana Fou e amata le porokalama ona tuu ai lea i le aufaigaluega a le EKT latou te faatautaia le porokalama. O le faatupeina o lea faamoemoe e faalagolago lava i le EKT.

O le fiaiaga ona o uso na faafailele atu i Kanana Fou o loo tele ai faifeau a le EKT. Sa matou feiloa'i ma ta'ita'i o le EKT faapea nisi o alii mautofi o le mālō e pei o le Palemia, Kovana o le Mālō o Tuvalu, Minisita o Fesooota'iga, ma nisi o tofiga o le Ekalesia i Tuvalu. Na maua le avanoa e talatalanoa ai ma faasoa i nei ta'ita'i e uiga i a'oa'oga na ma malaga atu ai. Na iai le lagona o nei ta'ita'i pe a toe faia lea a'oga—*Pastoral Counseling and Caring*—ia aofia ai ma tagata faigaluega a le mālō e aoga mo latou i le vāfealoa'i o tagata faigaluega.

E ese foi le matagofie o le motu ma ona tagata i le talimālō. Na maua foi le valaaulia a ma'ua ma le susuga ia Mauga e ta'ita'i lotu ma faia a latou faamanatuga i lea aso Sa. O le avanoa lelei foi lea na ma saunia ai se tala o alo ma fanau a le EKT o loo aoga i le Kolisi Faafaifeau i Kanana Fou. Na maua foi le avanoa i lea aso Sa e faafetai ai i matua ma aiga ona o le latou sapaapaia o alo ma fanau a le ekalesia o loo a'otau iinei i le Laumua. Na saunia lelei e le EKT le faamavaega mo ma'ua i le po mulimuli ae malaga mai i le aso e sosoo ai. Faafetai tele i le EKT mo le agalelei.

M. MEĀLOFA MO LE FAAMATAGOFIEINA O LE LAUMUA

E lagona le agaga faafetai ona o nisi o foa'i ma galuega lelei ua ofoina mai auā le faamatagofieina o le Laumua i Kanana Fou. O nei mea uma sa saili lava i ala o talosaga i le mālō ma nisi o pisinisi tu ma'oti. Ua outou silasila i laupapa faailo (*signs*) o loo faatutū i le itu i sisifo ma sasa'e o le 'aai o tusia ai tulafono mo le tausiga o le laumua a le Ekalesia. O ia laupapa faailo na saunia ma ofoina mai e le Matagaluega a le AS-EPA, e leai se tau. Ua momoli foi le agaga faafetai i le susuga i le Faatonu o le Matagaluega a le AS-EPA ia Pato Ameko mo lea fesoasoani aoga mo le Ekalesia.

Ua tofufusia foi maota o pulega ma faleaoga ma lapisi fou mo le otaota auā le faamatagofieina o fale ma le 'aai. Na maua mai lea foa'i i le talosaga na tuuina atu i le ASPA. E momoli le agaga faafetai i le susuga i le Faatonu a le Matagaluega ia Utu Abe Malae ma le ASPA mo le fesoasoani mai. Faafetai tele.

O le toe faafouina o le Igoa ma le ata o le Maa o i le itu i sasa'e o le "Ua Taunuu" na tusia ma saunia lava e susuga i a'oa'o e faimeālofa ai i le Ekalesia ia Iuni o le tausaga ua mavae 2016. Na fausia foi e susuga i alii a'oa'o le laupapa faailo mo le kolisi o loo i luma o le faleaoga, T. Muasau Business Office.


Na foa'i mai e le Vasega Faai'uasoo 2017 a le Bachelor of Divinity se mealofa o moa vao tulei (*push lawn mower*) e tolu (3) ma nisi o meafaigaluega mo le Kolisi. E le taugofie nei masini a ua taumafai lava le Vasega Faai'uasoo i se auala e faatino ai se fesoasoani mo lau Laumua auā le faamatagofieina o le 'aai a le Ekalesia. E ui ua na o le to'aono lenei vasega (ma faletua e to'atolu) a ua le taofia ai le agaga alofa ona o le a tuua le Laumua. Faafetai ma ia faamanuia le Atua i la outou Vasega Faai'uasoo 2017.

O le tausaga ua tuana'i atu, Iulai 2016, na foa'i mai ai e le susuga i le Toeaina, Rev. Dr. Leatulagi ma le faletua ia Vagai Faalevao moa ti'eti'e e lua (2) mo le Kolisi ma le Ekalesia auā le faaleleia o le Laumua. Faafetai tele.

N. TUSIGA—“FAALELEGĀ FULU O LE ‘AU‘AFAMAU A LE ATUA”

E faaosofia pea le agaga ma’ema’e ia manuia lau Kolisi Faafaifeau e ala i le tamāoaiga e faagaioi ai ana taulumaga faagasolo; aemaise lava o nei aso ua taugata le soifuaga ma le faatinoga o le tautua a le Kolisi i le a’oa’oina o fanau a le Ekalesia ia lava tāoso mo le galuega a le Atua. Ina ia faamāmā avega i le Ekalesia i lana faasoa mo le Kolisi o le afuaga lea o le naunau alofa e saili nisi o faiga e fesoasoani i le faatupeina o porokalama ma pili a lau Kolisi Faafaifeau.

Ua mae’a se tasi o galuega na feagai ai i la’u tusi ua faaulutalaina o le “*Faalelegā Fulu o le ‘Au’afamau a le Atua.*” E telē se taimi na taumafai ai lenei galuega pe a fua atu pe a ma le tolu (3) tausaga o su’esu’e ma taumafai e tuu faatasi i se tusiga. O le agaga faafetai ona o meālofa mai le Atua ua mafai ona faatino ai lenei tusiga na mafaufauina. Ua tusia lenei tusi ina ia fesoasoani i a’oa’o ma faletua e le gata ia iloa upu talafeagai o le gagana a ia malamalama foi i tala ma a’oa’oga a le Tusi Paia i le gagana Samoa. O nisi o mataupu o talanoaina i lenei tusiga o le talafaasolopito o le Tusi Paia ma le Ekalesia, su’esu’ega ma faaliliuga o tala a le Tusi Paia, saikolosi, mataupu silisili, uiga tatala o gagana ma vaogagana, faaipoipoga “*ituaiga-tutusa*” (*same-sex marriage*), ma lauga.



E mafai ona maua sau kopi o le tusi i le Ofisa o le Kolisi i se tau maulalo e **\$35.00**. Faafesoota’i le susuga i le Teutupe a le Kolisi, numera 699-0100 poo lana telefoni feavea’i 252-6005; po o la’u numera, 258-1129.



O le tamāoaiga e afua mai i lenei galuega o le a fesoasoani lava mo lau Kolisi Faafaifeau. O loo faagasolo pea nisi o tusitusiga e faasaosao ma faafailele ai mealofa a le Atua ua ia faamanuia ai le aufaigaluega galulue i lau Kolisi Faafaifeau. O loo tau faamae’a le tusi lona lua a le tusitala o le “*Ola Faa-Samoa i le Maniti a le Agaga*” (*Samoan Spirituality*).

P. “E MANATUA PULE A E LĒ MANATUA FAALAEŌ”

E manatua pea a’oa’oga a le Alii, ai sē talia outou ia outou faamanuia atu i ai. E faamauina le agaga faafetai i le Komiti a Tamā o le Ekalesia mo lana foa’i tupe na fesoasoani i le malaga a lau Laumua i Malua ia Aperila. Na agalelei ma foa’i mai le \$8,000.00 e fesoasoani i tapenaga a lau Kolisi mo lea faamoemoe tāua. Ia faamanuia le Atua i Tamā o le Ekalesia i le agalelei ma le alofa. Ia maua pea lo outou malosi i le tino ma le mafaufau auā tiute ma faiva o outou punonou ai i le Ekalesia. Faafetai, faafetai tele!

Ou te sosō atu foi ma le fiafia tele e faaoo le agaga faafetai i le ‘Au Uso mo lau fesoasoani i le malaga a lau Kolisi Faafaifeau. Na outou alolofa ma foa’i mai le \$3,000.00 e fesoasoani i nisi o tapenaga o le matou malaga. E ui ina ‘uti’uti lau faasoa a ua lē tuua ai lou titi faitama lelei ma lou alofa i alo ma fanau a le Ekalesia o a’otau ma galulue i totonu o lau Kolisi Faafaifeau. Faafetai i le agalelei.

E fia faamauina foi le agaga faafetai tele i le aufaigaluega-galulue ma le Ekalesia i lo outou maama'au faasoa ma tufa mai mo le Laumua. Ua outou agalelei mai i soo se tamāoaiga—o vai inu, tupe, lavalava ma taumafa—auā fanau o a'otau i le Laumua. Faafetai tele i aiga mo le faaavanoaina o outou fanua galulue ma faaeleeleaga e tua atu iai le Laumua mo ana tapenaga-taumafa i taualumaga faatino a le Kolisi.

Momoli foi le faafetai tele i le aufaigaluega ua mālōlō, susuga ia Rev. Dr. Ulisese Sala ma Rev. Faataape Lavata'i o ē na fesoasoani i le a'oa'oina o nisi o mataupu a lau Kolisi i lenei tausaga aoga, 2016-17. Faafetai i o la soifua ofoina mai mo le saunia o fanau a le Ekalesia mo le galuega. Mālō fai o le faiva i lenei tausaga.

O le matou tatalo ia tō mai lagī manū auā le faatamāoaigaina o outou soifua tautua mo le Ekalesia. Ia manuia Tamā o le Ekalesia faapea foi le 'Au Uso ma tinā uma o galulue mo le atina'ega o le Ekalesia. Fai mai se tasi o fuaitau, "O le mea tāua ma sili atu ona matagofie i le lalolagi e le mafai ona iloa e mata pe pa'i foi iai, ae lagona e le fatu." E faapena le lagona fiafia ua ootia ai le fatu e le mafai e upu ma tala ona faamatala, e le iloa foi e mata. Ua na o le Atua e silafia mealilo na te faagaetia outou loto i mea lelei ua outou faia mo lau Kolisi Faafaifeau i Kanana Fou.

S. TAGATA FAIGALUEGA A LAU KOLISI FAAFAIFEAU

E fia faailoa le agaga faafetai i le aufaigaluega galulue ma alii faiaoga a le Kolisi Faafaifeau i Kanana Fou. Faafetai i lo outou lagolagoina o ma'ua ua manuia ai le faatautaiga ma le ta'ita'iga o le Kolisi. Faamālō punonou i lena tausaga ua mavae; faafetai faaeaea ekalesia ma aiga. Sa outou galulue i tiute ma faiva ua valaauina ai auā fanau a le Ekalesia ia saunia mo le galuega. E ui foi ina iai lu'itau ma faigatā o le galuega, faafetai i lo outou loto tetele i le anoanoa'i o le galuega faatino auā le Laumua ma le Ekalesia Aoao. Sa tatou talimālō i le mafutaga a Komiti o Tamā o le Ekalesia—EFKS ma le EFKAS—i le masina o Mati. Na faaalua lava lo outou lagolagosua lelei ma le soo'ula ua a'e mālō ai o tatou faiva. Ua mālō le faatamasoālii!

O susuga i alii faiaoga ma tagata faigaluega a lau Kolisi na galulue i lenei tausaga ma le tausaga aoga fou:

	Faiaoga ma o latou Faailoga	Faiva o Galue Ai	Tausaga Galue	Faasilasilaga
1	Simi Mauga, M.Div.	Galuega Faafaifeau	5	
2	Mafo'e Faavae, MTS	Ulufalega / F. Fou	6	
3	Richard Faavae, MTS	Talafaasolopito	7	
4	Palenapa Mataafa, MTh	Talafaasolopito	3	
5	Liusamoa Simolea, MABL	Feagaiga Tuai	2	
6	Nafatali Falealii, MABS	Mataupu Silisili	8	
7	Fepuari Logoleo, MTS	Mataupu Silisili	6	
8	Faletoi Aofia, MABL	Feagaiga Fou	1	
9	Harold Eveni, MABL	Feagaiga Fou	3	
	Faiaoga ua mo le tausaga aoga ia Setema 2017 & Ianuari 2018:			
10	Elekosi Lafitaga, PhD	Feagaiga Fou		
11	Ben Laie, PhD	Feagaiga Tuai		
12	Luaao Leasiolagi**	Talitonuga Kerisiano Eseeese	5	Sa faiaoga muamua...
	Ofisa o le Kolisi Faafaifeau (administrative posts)			
13	Evelyn Eveni	Faletusi (Librarian)	3	
14	Ana Tuigamala	Failautusi a le Kolisi	1 (3)	Na galue muamua Ofisa Tutotonu
15	Timoteo Esekia, BD	Resitala	6	
16	Romeo Isaia Seiuli	Teutupe	1	
17	Moreli J. Niutaoa	Peresitene	10	

(Faasilasilaga: ** O le susuga ia Luaao Leasiolagi ua toe fo'i mai e faamae'a atu iinei lana pepa mo lona faailoga o le PhD. Ua lata ina mae'a lana galuega o le pepa ma ua manatu e fo'i mai e taugofie iinei i loo le alala pea i le aoga o a'otau ai i Fiti. Ua faamoemoe o le tausaga fou e atoatoa ai lana tapenaga mo lana pepa. Tatou tatalo pea mo le susuga i le alii faiaoga ina ia manuia lona taumafai.)

T. A'OA'O UA FAAULUULU I AI LE TAUSAGA FAAI'UASO 2017

Ua mae'a le iloiloga o mataupu faalemafaufau ma vaega uma o le soifua a'oa'oina o le Vasega Faai'uaso 2017. E le se galuega ititi na feagai ma le vasega o faiaoga le iloiloga o togi ma vaega ta'itasi mo le faamalieina o le porokalama Bachelor of Divinity (BD). O le filifilia o le togi mauuluga poo le a'oa'o e faauluulu iai le Vasega Faai'uaso i tausaga ta'itasi e aofia ai vasega ma mataupu mai le ulua'i tausaga seia oo mai i le tausaga fa. E faia le iloiloga pe a mae'a suega faai'u o le kuata mulimuli (*spring*) o le tausaga faau'u.

O lenei tausaga ua tutusa ai susuga i a'oa'o e to'alua ina ua mae'a le iloiloga o togi ma mataupu. O le ulua'i taimi foi lenei ua tutusa ai se to'alua i le togi mauuluga. O la'ua nei o le susuga ia **Apisaloma Toleafoa** ma **Craig Masaniai**. O le susuga i le a'oa'o ia Apisaloma Toleafoa na su'e mai i le ekalesia i Fagatogo, o galulue ai le susuga ia Rev. Iasepi & Leone Ulu. O le susuga i le a'oa'o ia Craig Masaniai na su'e mai i le ekalesia Ierusalem Fou i Hawaii, o galulue ai le susuga ia Rev. Tafale & Dorothea Fuiava.

Faamālō ma faafetai i susuga i a'oa'o i le filifiligā ma le sailiili ua tau le faamoemoe sa lupe. Ia faamanuia le Atua ia te oulū.

V. UPU TAUMAVAE

Le paia e, o le Ekalesia Aoa faapea matua ma aiga ma le 'auvalaaulia, ona o le matua o faiva ma le tapua'iga ua a'e mālō ai le taumafai o fanau ma malie ai faataunuuga a lau Kolisi Faafaifeau i Kanana Fou. E faaosofia ai le agaga 'ai'aiuli i le lagolagosua ma le titifaitama i le paia o le Ekalesia faapea le aufaigaluega, o matua ma aiga i le limalelei ma le 'anava o le galulue punoua'i auā fanau a le Ekalesia ia manuia. Mālō fai o le faiva! Faafetai le agalelei ma le alolofa.

Tasi o mea tāua ou te fia tautala i ai o le agaga faagaetia i le fatu ma le 'auga o manuia i soo se Kolisi Faafaifeau. O le ā lea? O le tinā ma le tamā ma le fanau, matua tausi ma le tapuaiga a le 'au matutua, o ekalesia ma aiga ma nuu o loo tapuaia o tatou faiva. E faigofie ona iloa le moni i totonu o le lotoifale o ekalesia pe afai o malu le fe'au a le Atua i loto ma mafaufau o matua ma aiga ma nuu.

E molimauina lava pelega o aso faapenei o fanau faauu auā o taulaga tagata ua ofoina le soifua mo le galuega. O latou o lupe faalele e to'ala faaautama iai matua ma aiga. Ua mae'a ona faafailele fanau i le Laumua a le Ekalesia ma ua tuuina atu i le si'osi'omaga o le Ekalesia e apelepele e lima alolofa ma le agalelei o matua ma aiga. Le fanau faauu ia fetu tauave lo outou faalagiga lena o a'oa'o ma faletua o le Laumua i Kanana Fou. Ia faamanuia atu le Atua ia te outou.

O le toe upu pe afai ua iai ni faaletonu o lau Kolisi Faafaifeau i le faatinoga o ona tiute ma faiva i lenei tausaga aoga, malū vai ave i fale ia maua sou finagalo to'amālie. E poto a le tautai ae sesē lana atu i ama. Pe a talamea seu le seuga, seseu i fanua le aiga tautai ma le faatamasoaliiga. Ia manuia le 'au valaaulia.

Ia manuia le Ekalesia, Komiti a le Au Toeaina faapea le aufaigaluega; ia lagi e mamā le soifua o le atunuu, maua foi le malosi e matua ma aiga. Soifua ona o Iesu Keriso.